

## Kalaallit Nunaannut biilersinnaanermut allagartaq (kørekort-i) pillugu nalunaarummut

Inatsimmik nalunaarut nr. 995, 26. oktober 2009-meersoq naapertorlugu, Kalaallit Nunaanni angallannermut inatsimmi § 13, imm. 6, §§ 14 aamma 15, § 16, imm. 4, § 19, oqaaseqatigiit pingajuat, § 21 aamma § 56, imm. 2 malillugit, Færdsselsstyrelsen-ip suliaasai aamma pisinnaatitaaffii kiisalu naammagittaalliorfissiissutai pillugit nalunaarummi nr. 787, 18. juni 2025-imeersumi § 4 naapertorlugu piginnaatitaaneq malillugu tulluuttut aalajangersarneqarpoq:

## Kapitali 1

*Aalajangersakkat nalinginnaasut*

**§ 1.** Tamatumunnga akuerisaasoq immersugassaq, biilersinnaanermut misilitsinnissamut innersuunneqarnissaq pillugu qinnuteqaat, tulluuttut:

- 1) Assiliivimmik assilisaq assingulluartoq asseq, (inuup kinaassusianik ersersitsisoq, nasaqanngitsoq) 35 x 45 mm-inik angissusilik. Aserujaatsuussaaq aammalu fotopapir-imut nalinginnaasumut saattumut assilinqarsimasooq (kopiigaaq) aammalu naqissusigaanngitsoq,
- 2) pisortanit atuutilersitaasoq, tamatumani qinnuteqartup inuttut normuanik ersersitsisoq kinaassutsimut uppersarsaat pappialaq, kiisalu
- 3) nakorsap peqqissuunermut allagarsiussaa,

kakkiullugit, politiinut imaluunniit kommunefoged-imut tunniunneqassapput.

*Imm. 2.* Qinnuteqartoq, upperisamik tunngavilimmik tamatuminnga noqqaassuteqarnermik saqqummiussippat, imm. 1, nr. 1)-imi eqqaaneqartumi assimi, qinnuteqartoq nasartaateqarsinnaasoq/nasaqarsinnaasoq, Politiinit akuerineqarsinnaavoq.

**§ 2.** Nakorsap peqqissuunermut allagarsiussaa, immersugassami, Peqqissutsimut Naalakkersuisoqarfimmit akuerisaasumi, atuutilersinneqarsimassaaq. Qinnuteqartup nalinginnaasumik napparsimmavianiit imaluunniit assigisaaniit allagarsiussaq nakorsamit atuutilersitaassaaq. Nakorsap allap allagarsiussaq atuutilersippagu, qinnuteqartup tamanna tamakkiisumik tunngavilersussavaa. Nakorsap allagarsiussaani nassuiarneqartoq inuk taannaanersoq, taanna inuk, assimiittumut assiusutut uppersarsaasiinermut, assip tunuatigut nakorsaq oqaaseqaatitalimmik atsiussaaq. Oqaaseqaatitalimmik atsiorneq, meqqitut allaasutut ikkussaanani, toqqaannartumik assip tunuani allataassaaq. Allagarsiussaq aamma asseq, nakorsamit, politiinut imaluunniit kommunefoged-imut toqqaannartumik nassiunneqassapput, imaluunniit, nakorsap atsiorneranik pilikkamik, allakkat puuani matoqqasumi qinnuteqartumut tunniunneqassalluni.

*Imm. 2.* Nakorsamit peqqissuunermut allagarsiussaq, qinnuteqaatip tunniunneqarnerani, qaammatinit pingasunit pisoqaaneroqqusaanngilaq biilersinnaanermullu allagartap atuutilersinneqarnerani ukiumit ataatsimit pisoqaaneroqqusaani.

**§ 3.** Nakorsap peqqissuunermut allagarsiussaani paasissutissat tunngavigalugit, biilersinnaanermut allagartap kissaatigineqartup pinissaanut, qinnuteqartup peqqissutsimut piumasaqaataasut naammassineraí politiit aalajangiivigissavaat.

Biilersinnaanermut allagartaq atuutilersinneqarsinnaanersoq imaluunniit atugassarititaasuni immikkut ittuni atuutilersinneqassanersoq aalajangiinissamut ilassutitut paasissutissanik nakorsamit immikkut ilisimasalimmit imaluunniit allamit, nalunaarummik pissarsisoqassasoq, politiinit piumasaqaatigineqarsinnaavoq. Politiinit toqqagaasumit politiimit, biilersinnaanermut allagartaq, imaluunniit atugassarititaasuni immikkut ittuni, atuutilersinneqarsinnaanersoq nalilerniarlugu, qinnuteqartoq piginnaasanik ersersitsissusamik biilernermik misilitsissasoq, aammattaaq politiinit piumasaqaatigineqarsinnaavoq. Qinnuteqartoq biilnik sungiusaatissatut akuerisaasunik pissarsissasoq politiinit piumasarineqarsinnaavoq.

**§ 4.** Piffissamik killilimmik atuuffissalerlugu, imaluunniit biilnut immikkut piumasaqaatinut allattukkanik naammassinittumik killilerlugu imaluunniit allatut atugassarititaasunik immikkut ittunik piumasaqaateqarfiusumik biilersinnaanermut allagartaq atuutilersinneqarsinnaavoq. Motorcykel-inut ingerlatsisinnaanermut allagartaq pillugu sukumiinerusumik maleruagassat aalajangersassallugit Kalaallit Nunaata Politiivi piginnaatitaapput.

*Imm. 2.* Innarluutilinnut qamuteeqqanut arriitsunut ingerlatitsisinnaanermut allagartaq, inunnut 15-ileereersimasunut atuutilersinneqarsinnaavoq.

**§ 5.** Qinnuteqartoq ikiaroornartunik pinngitsuuisinnaanngitsoq imaluunniit aanngajaarniutininik allanik imaluunniit imerajuttuuneranik paasissutissaqarpat, ingerlatitsisinnaanermut allagartaq atuutilersinneqassanngilaq.

*Imm. 2.* Ingerlatitsisinnaanermut allagartaq itigartitsissutigineqarpat, tamatumunnga apeqqut, Kalaallit Nunaannut pinerluttulerinermik inatsimmi § 164, imm. 3-mi maleruagassat malillugit eqqartuussivinnut suliaassiissutigineqarnissaa piumasarineqarsinnaavoq.

## Kapitali 2

### *Biilersinnaanermut sungiusarneq aamma biilersinnaanermut misilitsinnerit*

**§ 6.** Qamutit immikkoortitsernerinut tulluuttunut biilersinnaanermut allagartamik angusinissamut misilitsittoqarsinnaavoq:

1) Immikkoortitigaq (Kategori) B (Biilit nalinginnaasut). Aquttuata saniatigut, amerlanerpaamik inunnut arfineq pingasunut inissallit biilit, tamakkiisumillu 3500 kg.-ut ataallugit oqimaassusillit. Biilnut nalinginnaasunut biilersinnaanermut allagartaq, aammattaaq tulluuttunik:

- a) Tamakkiisumik akuerisaasumik 3500 kg.-ut ataallugit oqimaassusillit nioqqutissanik assartuutit biilit,
- b) inunnut- imaluunniit nioqqutissanut assartuutit biilit, akuerisaasumik 750 kg.-nit oqimaannerunngitsunik ikkuttakkanik kalitallit,
- c) inunnut- imaluunniit nioqqutissanut assartuutit biilit, akuerisaasumik 750 kg.-nit oqimaannerusunik ikkuttakkanik kalitallit, kalitariit katillutik tamakkiisumik akuerisaasumik 3500 kg.-nik qaangiinngippata,

- d) motorcykel-it pingasunik assakaasullit,
- e) Traktor-it/sakkut motorillit, ingerlatsinissamut pisinnaatitsivoq.

2) Immikkoortitikkat (Kategori) C-D (Lastbiilit aamma inunnut biilit angisuut). Lastbiilit tamakkiisumik akuerisaasumik 3500 kg.-ut sinnerlugit oqimaassusillit aamma aquttup saniatigut arfineq pingasut sinnerlugit issiavissallit imaluunniit tamakkiisumillu akuerisaasumik 3500 kg.-ut sinnerlugit oqimaassusillit inunnut biilit. Lastbiilinut aamma inunnut biilinut angisuunut biilersinnaanermut allagartaq tulluuttunik:

- a) ikkuttakkanik kalitalinnik, kalitariit aammalu ikkuttakkap kalittakkap angallatip tamakkiisumik oqimaassusaa apeqqutaatinagit, Lastbiilini imaluunniit inunnut biilini angisuunik
- b) kalittakkanik assakaasulinnik motorilinnik,

ingerlatitsinissamut pisinnaatitsivoq.

*Imm. 2.* Aammattaaq inuussutissarsiutigalugu inunnik assartuinissamut biilersinnaanermut allagartamik atuutilersitsisoqarsinnaavoq.

*Imm. 3.* Kalaallit Nunaata Politiivi motorcykelinut ingerlatsinermik misilitsinnermut maleruagassanik sukumiinerusunik aalajangersaanissamut piginnaatitaapput.

**§ 7.** Immikkoortitikkamut (kategorimut) kissaatigineqartumut, qinnuteqartoq siusinnerusukkut biilersinnaanermut allagartaqarsimanngippat, pineqartoq, immikkoortitikkamut (kategori-mut) pineqartumut politiinit akuerisaasumit inummit, biilersinnaanermut piginnaasanut ilinniartitaasimassaaq.

*Imm. 2.* Atuagarsorluni ilinniartitsineq, Kalaallit Nunaanni biilersinnaanermut ilinniartitsinnermut Atuagarsorluni ilinniut naapertorlugu, ingerlanneqarsimassaaq.

*Imm. 3.* Immikkoortitikkamut (kategori) C-D'-mut ilinniartitsineq, qinnuteqartoq immikkoortitikkamut (kategori-mut) B-mut biilersinnaanermut allagartamut angusereersimappat aatsaat, aallartinneqarsinnaavoq. Taamaattoq qinnuteqartoq immikkoortitikkamut (kategori-mut) B-mut biilersinnaanermut sionatigut allagartaqarnikuusimappat, pineqartup biilersinnaatitaajunnaarallarsimanagera apeqqutaatinagu, immikkoortitikkamut (kategori) C-D'-mut ilinniartitsineq aallartinneqarsinnaavoq.

*Imm. 4.* Inunnut, biilernermut ilinniartunut, sungiusaatitut biilernerq, politiinit tamatumunnga akuerisaasuni biilini taamaallaat, pisassaaq.

*Imm. 5.* Biilernermut sungiusarnermut biilini akuersissuteqarnerq, ataasiakkaatut imaluunniit ataatsimut isigalugu nalunaarutigineqarsinnaavoq. Ilinniarnertut biilernerup nalaani, biilit siummik aqumikkullu biilersinnaanermut ilinniutitut allagartaqassapput. Biilersinnaanermut ilinniutitut allagartaq qaqqortuussaaq, qernertumillu »skolevogn«-imik allassimasooqassalluni.

*Imm. 6.* Inummik § 8 malillugu politiinit akuerisaasumik biilini ilinniartup sanianiittoqarpat taamaallaat, biilernermut sungiusartoqaqqusaavoq. Taanna inuk, biilersinnaanermut sungiusarnermi, biilini ingerlatsisuusutut isigineqartarpoq. Biilersinnaanermut misilitsinnermi, ilinniartuusoq biilini ingerlatsisuusutut isigineqartarpoq.

*Imm. 7.* Sungiusaatitut biilerneq, biilersinnaanermut allagartamik kissaatigineqartumik atuutilersitsinissamut piffissap qinnuteqartup ukiunik utoqqaassutsimigut piumasaqaatinik naammassinniffigisassaa qaammatinit pingasunit siusinnerusumik, aammalu inunnut apeqqutaatitaqarani allagartaajagaasimasunut, allagartaajagaaffiup naanissaaniit qaammatinit pingasunit siusinnerusumik, peqqusaanngilaq.

**§ 8.** Inuk, 21-nik ukioqalereersimasooq, ukiunilu marlunni biilersinnaanermut allagartaqareersimasooq, biilersinnaanermut allagartartaarnissamik kissaateqartunik allanik, pineqartoq ilinniartitsinissamut naleqquttoq, politiinit nalilerneqarpat, biilersinnaanermi, ilinniartitsisutut akuersissummik tunineqarsinnaavoq.

*Imm. 2.* Piffissamik sukumiinerusumik allatamik ukiut tallimat tikillugit akuersissut tunniunneqarsinnaavoq. Akuersissummut uppersaammik politiit atuutilersitsisinnaapput. Akuersissummik nutarterinermi, imm. 1-i taamatuttaaq atuupput.

**§ 9.** Biilernermut misilitsinneq, atuagarsornermik aamma biilernermik misilitsinnermik imaqarpoq.

*Imm. 2.* Atuagarsornermik misilitsinneq, biilersinnaanermut allagartaq kissaatigineqartoq atuutilersinniarlugu, siusinnerpaamik qinnuteqartup naammattunik ukioqalernissaanut qaammat ataaseq sioqullugu, pineqarsinnaavoq.

*Imm. 3.* Misilitsinnerup biilernertaa, biilersinnaanermut allagartaq kissaatigineqartoq atuutilersinniarlugu, aatsaat qinnuteqartoq naammattunik ukioqalerpat, nalinginnaasumik pineqarsinnaavoq.

**§ 10.** Ilanngussaq 1-i naapertorlugu, misilitsinnerup atuagarsornertaa ingerlanneqassaaq.

*Imm. 2.* Immikkoortitikkamut (kategori-mut) C-D'-mut misilitsittoqarpat, qinnuteqartup, tamakku biilit angisuut pillugit, aalajangersakkat immikkut ittut (kalitassamik katititsissutit, bremsesystemii, usilersornissamut maleruagassat immikkut ittut il.il.) ilisimasaqarfigissavai.

**§ 11.** Taassumaa inuup, qinnuteqartumik ilinniartitsisimasup, atuagarsornermik misilitsittoqartinnagu, qinnuteqaatitut immersugassami atsiornermigut, § 7, imm. 2 naapertorlugu, qinnuteqartoq ilinniartinneqarsimasooq, uppersassavaa.

**§ 12.** Biilerluni misilitsinneq, atuagarsornermik misilitsinneq angusiffigineqareerpat aatsaat, ingerlanneqarsinnaavoq.

*Imm. 2.* Qinnuteqaat tunniunneqassaaq. atuagarsorlunilu angusinerup kingorna, qaammatit aqqaneq marluk qaangiutsinnagit biilerluni misilitsinneq angusiffigineqassalluni.

**§ 13.** Biilerluni misilitsinnermi, qinnuteqartoq nammineerluni tamatumunnga atugassanik biiliniq pissarsissaaq. § 7, imm. 4-mi aalajangersagaq, taamatuttaaq atuuppoq.

*Imm. 2.* Atuagarsorluni soorluttaaq aamma biilerluni misilitsinnermi, qinnuteqarnermut immersugassaq aamma siusinnerusukkut biilersinnaanermut allagartarisimasinnaasaq nassarneqassapput.

**§ 14.** Qinnuteqartoq, peqqissutsimut tunngasunik peqquteqartumik § 4 naapertorlugu, ingerlatinik immikkut ittunik, imaluunniit ingerlatsissutinik immikkut ittunik pisatsersukkanik taamaallaat ingerlatsinermut allagartartaarsinnaappat, ingerlatsissutinik taamaattunik misilitsittoqassaaq.

**§ 15.** Ingerlatsinermut misilitsinnerup biilernertaa, ilanngussaq 1-i naapertorlugu ingerlanneqassaaq.

**§ 16.** Angallannermut maleruagassanik pingaarutilinnik ilisimasakippallaarneq pissutigalugu imaluunniit aqqorluppallaanermik peqquteqartumik Qinnuteqartoq misilitsinnermut angusinngitsoorpat, immikkoortitikkanut (kategori-nut) allanut ingerlatsinermut allagartarisimasinnaasaq pigiinnarniarlugu, qinnuteqartoq nakkutigisaasumik biilernermut misilitsissanersoq, § 26-imi maleruagassat malillugit politiit aalajangissavaat.

**§ 17.** Atuagarsorluni imaluunniit ingerlatsilluni misilitsinnerup inernera, qinnuteqartumut erngertumik misilitsinnerup kinguinnguagut nalunaarutigineqassaaq.

### Kapitali 3

#### *Biilersinnaanermut allagartamik atuutilersitsineq*

**§ 18.** Qinnuteqartoq biilersinnaanermut misilitsinnermik angusisimappat, pineqartoq, allagartartaartitsisartup takkuani, kinaassutsimut allagartamik (stamkort-imik) immersuissaaq. Taamaalioreernermi allagartartaartitsisartoq, biilersinnaanermut allagartaagallartumik atuutilersitsissaaq. Siusinnerusukkut biilersinnaanermut allagartaasimasinnaasoq, allagartartaartitsisartumut tunniunneqassaaq.

*Imm. 2.* Biilersinnaanermut allagartamik pisaarnissamut piumasaaqatit allallu eqqortinneqarpata, Kalaallit Nunaata Politiivinit biilersinnaanermut allagartaq atuutilersinneqassaaq. Atugassarititaasinnaasut immikkut ittut, biilersinnaanermut allagartami imaluunniit ilassutitut allagarsiussami allanneqassapput.

*Imm. 3.* Biilersinnaanermut allagartaq, piginnittuusup 70-iliinissaata tungaanut atuuttussamik atuutilersinneqassaaq. Piffissami biilersinnaanermut misilitsinnermik angusinerup nalaani qinnuteqartoq 65-iliisimappat, kisianni 70-iliisimanani, biilersinnaanermut allagartaq ukiunut tallimanut atuuttussiarineqassaaq.

*Imm. 4.* Qinnuteqartoq, piffissami biilersinnaanermut misilitsinnermi angusinerup nalaani 70-ileereersimappat sinnerlugilluunniit, biilersinnaanermut allagartaq tulluuttunik:

1) 70-inik ukiulinnut: ukiunut 4-nut,

2) 71-inik ukiulinnut: ukiunut 3-nut,

- 3) 72-79-inik ukiulinnut: ukiunut 2-nut,  
4) 80-inik ukiulinnut: ukiumut 1-mut,  
atuuffissalerlugu atuutilersinneqassaaq.

*Imm. 5.* Peqqissutsimut tunngatillugu paasissutissaqarpat, pineqartup imerajuttuunnginnissaa imaluunniit aanngajaarniutinik allanilluunniit sianissutsimut sunniisartunik malussataarniutinik pinngitsuuisinnaanera, tusaamaneqartoq, imaluunniit tunngavissalimmik qularineqartoq, taava imm. 3 aamma 4-mi allassimasumiit piffissamiit sivikinnerusumik atuuttussanngorlugu, biilersinnaanermut allagartaq atuutilersinneqarsinnaavoq.

#### Kapitali 4

##### *Biilersinnaanermut allagartap assilineri (Duplikatkørekort-i)*

**§ 19.** Biilersinnaanermut allagartaq tammaaneqarpat, ajoquserneqarluniluunniit imaluunniit ima nungullartigippat, allannertai, kisitsisitali, naqinnerit imaluunniit assitaa sumiiffiimmi misissorneqarsinnaanani, imaluunniit plastiki illersuutaasoq ajoqusersimappat, biilersinnaanerlu sulii atugarineqassappat, piginnittuusup allagartap assilineranik atuutilersitsisoqarnissaa qinnutigissavaa. Taamaattoq, atermik allannguinermit- imaluunniit najukkamik allannguinermit, tamanna atuutinngilaq.

*Imm. 2.* Angallannermik misissuinermit atatillugu politii, biilersinnaanermut allagartaq ajoqusersimasooq imaluunniit nungullaannikoq arsaarinnissutigisinnaavaat. Biilersinnaanermut allagartaq sumiiffimmi arsaarinnissutigineqarpat, sapinngisamik biilersinnaanermut allagartaagallartumik politii suliarinnissapput.

*Imm. 3.* Biilersinnaanermut allagartap assilineri pillugu qinnuteqaat, politii imaluunniit kommune-fogedimut tunniunneqassaaq. Qinnuteqaammut asseq kiisalu § 1, nr. 1-i aamma 2 naapertorlugit pisortanit atuutilersinneqartoq kinaassutsimut allagartaq ilanngunneqassapput. Qinnuteqartoq politii- imaluunniit kommune-fogedip allaffiani kinaassutsimut allagartamik (stamkortimik) immersuissaaq. Biilersinnaanermut allagartaq tammarsimappat, qinnuteqartoq aammattaaq tamanna pillugu nalunaaruteqassaaq. Biilersinnaanermut allagartaq ajoqusersimasooq, biilersinnaanermut allagartap assilineranik taarserneqarnissaanik kissaatigineqartoq, politii imaluunniit kommune-fogedimut tunniunneqassaaq.

#### Kapitali 5

##### *Biilersinnaanermut allagartamik annertusaaneq*

**§ 20.** Biilersinnaanermut allagartamik immikkoortitigaq B-mik, immikkoortitikkanut C-D'nut atuutilersinniarlugu, annertusaanissaa pillugu qinnuteqaat, politii imaluunniit kommune-fogedimut tunniunneqassaaq. Qinnuteqaammut asseq kiisalu § 1, nr. 1-i aamma 2 naapertorlugit pisortanit atuutilersinneqartoq kinaassutsimut allagartaq ilanngunneqassapput.

*Imm. 2.* Nakorsap peqqissusermit allagarsiussaa qinnuteqaammut ilanngunneqassanngilaq, taamaattoq, politii pisariaqartutut nalilerneqarpat piumasarineqarsinnaalluni.

*Imm. 3.* Kapitali 2-mi maleruagassat naapertorlugit biilersinnaanermut misilitsittoqartassaaq.

## Kapitali 6

### *Inuussutissarsiutigalugu inunnik angallassinnaanissamut biilersinnaanermut allagartaq*

**§ 21.** Angallatinut motorilinnut biilersinnaanermut allagartaq, inuussutissarsiutigalugu inunnik angallassinissamut atugassaq, qinnuteqartunut

- 1) 21-nik ukioqalereersimasunut,
- 2) sivikinnerpaamik ukiumi ataatsimi, immikkoortitikkamik (kategori) B-mut (biilinit nalinginnaasunut) biilersinnaanermut allagartaqareersimasumut, aamma
- 3) inuussutissarsiutigalugu inunnik angallassinissamut biilersinnaanermut misilitsinnermik angusisimasunut,
- 4) atuutilersinneqarsinnaavoq.

*Imm. 2.* Inuussutissarsiutigalugu inunnik angallassilluni biilersinnaanermut allagartaq pillugu qinnuteqaat, politiinut imaluunniit kommuneqagedimut tunniunneqassaaq. Qinnuteqaammut asseq kiisalu § 1, nr. 1-i aamma 3 naapertorlugit pisortanit atuutilersinneqartoq kinaassutsimut allagartaq ilanngunneqassapput.

**§ 22.** Inuussutissarsiutigalugu inunnik angallassinissamut biilersinnaanermut allagartaq, qinnuteqartup biilersinnaanermut allagartaqarfigisaanut immikkoortitikkamut (kategorimut) taamaallaat atuutilersinneqarsinnaavoq. Biilersinnaanermut allagartaq biilinit nalinginnaasunut imaluunniit soorluttaaq biilinit nalinginnaasunut taamatut inunnut biilinit angisuunut atuutilersinneqarsinnaavoq.

**§ 23.** Inuussutissarsiutigalugu inunnik angallassinissamut biilersinnaanermut allagartaq, Kalaallit Nunaannut pinerluttulerinermik inatsimmi § 164, imm. 2-mi eqqaaneqartumut piumasaqaammut atatillugu itigartitsissutigineqarsinnaavoq.

*Imm. 2.* Inuussutissarsiutigalugu inunnik angallassinermut biilersinnaanermut allagartaq itigartitsissutigineqarpat, piumasaqartoqarneratigut, peqqusissuteqartartut oqartussaasut, Kalaallit Nunaannut pinerluttulerinermik inatsimmi § 164, imm. 3-mi maleruagassat malillugit, apeqqut eqqartuussisunut suliakkiutigissavaat.

**§ 24.** Inuussutissarsiutigalugu inunnik angallassinermut biilersinnaanermut misilitsinneq, §§ 9, 10 aamma 12-15-imi maleruagassat naapertorlugit pisassaaq. §§ 16 og 17-imi aalajangersakkat taamatuttaaq atuupput.

*Imm. 2.* Qinnuteqartoq biilerluni misilitsinnermi, sakkunik atortoqarani, tikkuarsinnaassavai aammalu ilaatillugit nammineq oqaatsiminik, biilit pisatai isumannaallisaanermut pingaarutillit, ilaatillugit pisattat asiilasoqalerfiusartut aammalu nungullaaffiusartut, pillugit nassuiarsinnaassavai aammalu bremset aamma aquutit atornissaat, paarinissaat aammalu aserfallatsaalinissaat kiisalu aserfallatsaaliinnermut aamma paarsinnermut piumasaqaataasumik ima annertussusilimmik tamakkua atuunneri pillugit ilisimasaqarfigilluarnernik ersersitsissalluni.

*Imm. 3.* Biilerluni misilitsinnermi ilinniartup aqutsilluarsinnaaneranut annertunerusumik piumasaqarfiussaaq soorluttaaq, immikkoortitikkamut B-mit (biilit nalinginnaasunit) aammalu

immikkoortitikkamut D-mut (biilnut angisuunut) naleqqiullugu, kukkunerit sukannernerusumik nalilerneqartassasut.

**§ 25.** Inuussutissarsiutigalugu inunnik angallassinermut biilersinnaanermut allagartaq, § 18-imi maleruagassat malillugit atuutilersinneqassaaq.

*Imm. 2.* Inuussutissarsiutigalugu inunnik angallassinermut biilersinnaanermut allagartaq, biilersinnaanermut allagartaq pineqartoq sivikinnerusumik atuuffissaligaanngippat imaluunniit peqqissutsumik peqquteqartumik sivikinnerusumik atuuffissaligaanngippat, ukiunik tallimanik atuuffissalerlugu atuutilersinneqassaaq.

## Kapitali 7

*Biilersinnaatitaanermik arsaarinnineq pillugu aamma nakkutigisamik biilersinnaanermut misilitsinnerit pillugit aalajangiisarneq*

**§ 26.** Biilersinnaanermut allagartap pinissaanut pineqartup piumasaqaatit eqqortissinnaajunnaarpagit biilersinnaatitaaneq politiinit arsaarinnissutaasinnaavoq.

*Imm. 2.* Inuussutissarsiutigalugu inunnik angallassinermut biilersinnaatitaaneq, Kalaallit Nunaannut pinerluttulerinermik inatsimmi § 164-imi maleruagassat naapertorlugu atorunnaarsinneqarsinnaavoq.

**§ 27.** Pineqartoq biilersinnaanissamut sulii piginnaaneqarneris, angallannermut maleruagassanik pisariaqartunik ilisimasaqarneris, imaluunniit angallattunik allanik eqqarsaatiginninnissamik paasisimasaqarneris, tunngavissaqarluni qularutigineqarpat, kapitali 10 naapertorlugu biilersinnaanermut allagartamik piginnittoq nakkutigisamik biilersinnaanermut misilitsissasoq, politiinit aalajangerneqarsinnaavoq. Politiinit aalajangerneqartumik piffissaliussap iluani misilitsittoqassaaq.

*Imm. 2.* Politiit aalajangiinnerannut peqqutaasut pissutsit malillugit, pineqartup biilersinnaanermut misilitsinneq angusiffigisimappagu, nakkutigisamik misilitsittoqassanngilaq.

*Imm. 3.* Biilersinnaanermut allagartalik nakkutigisamik biilersinnaanermut misilitsinnermut peqataajumanngippat, ingerlaannartumik biilersinnaatitaanermik politiit arsaarinnissuteqarsinnaapput. Aammattaaq, siullermeerluni misilitsinneq angusiffiunngippat, biilersinnaatitaaneq arsaarinnissutigineqassaaq.

**§ 28.** Kukkoqqinnermi biilersinnaatitaaneq arsaarinnissutaasussaappat, politiinit aalajangersarneqartup piffissarititaasup iluani, biilersinnaatitaanermut allagartalik, kapitali 10 naapertorlugu, nakkutigisamik biilersinnaanermik misilitsissaaq.

*Imm. 2.* Taamaattoq, arsaarinninnermut pissutaasut pissutsit malillugit pineqartup biilersinnaanermut misilitsinneq angusiffigisimappagu, nakkutigisamik biilersinnaanermut misilitsittoqassanngilaq.



*Imm. 3.* Biilersinnaanermut allagartaatik, nakkutigisamik biilersinnaanermut misilitsinnermut peqataajumanngippat, biilersinnaatitaanerani arsaarinnissinnaapput. Aammattaaq misilitsinneq siullermeernermi angusiffiunngippat, biilersinnaatitaaneq arsaarinnissutigineqassaaq.

**§ 29.** Biilersinnaanermut allagartalik sulii naammaginatut peqqissuseqarnera imaluunniit imerajuttuunnginnissaa imaluunniit aanngajaarniutiniq allanilluunniit sianissutsimut sunniisartunik malussataarniutiniq pinngitsuuisinnaanera, tunngavissaqartut qularineqartoq politiiniq maluginiarneqarpat, tamatumunga aalajangiinissamut pisariaqartut misissortissalluni imaluunniit misilitsissalluni, ilaatillugit §§ 3 aamma 5-i naapertorlugit, nakorsap, pisariaqassappat nakorsap immikkut ilisimasallip, allagarsiussaaniq pissarsissalluni, pineqartoq pisussaavoq. Nakorsap allagarsiussaanut aningaasartuutit il.il. biilersinnaanermut allagartallup akilissavai.

*Imm. 2.* Biilersinnaanermut allagartalik, pisariaqartut misissortinnissanut imaluunniit misilitsinnernut peqataajumanngippat, biilersinnaatitaaneq politiit arsaarinnissutigisinnaavaat.

*Imm. 3.* Misissuinerit imaluunniit misilitsinnerit tunngavigalugit biilersinnaatitaaneq arsaarinnissutaassanersoq imaluunniit, § 4 aamma § 18, imm. 5-i naapertorlugu immikkut ittunik killilersuutaasinnaasunik ilalerlugu, biilersinnaanermut allagartallup biilersinnaatitaaneq piginnassaneraa aalajangerneqassaaq.

*Imm. 4.* Biilersinnaatitaaneq annikillisaasarneqarpat, biilersinnaanermut allagartamik nutaamik atuutilersitsisoqassaaq. Pineqartoq, § 1, nr. 1 aamma 2 naapertorlugit assimik aammalu pisortanit atuutilersitamik kinaassutsimut uppersaammik tamatumani qinnuteqartup inuup normua ersersitsisumik, tunniussissaaq kiisalu politiini imaluunniit kommuneqarfi-imik kinaassutsimut uppersaammik (stamkortimik) immersuissalluni.

*Imm. 5.* Pineqartup imerajunnera imaluunniit aanngajaarniutiniq imaluunniit sianissutsimut malussataarniutiniq allanik pinngitsuuisinnaannginnera pissutigalugu biilersinnaatitaanera arsaarinnissutigineqarpat, apeqqut eqqartuussivinnut tunniunneqassasoq piumasarineqarsinnaavoq.

**§ 30.** Biilersinnaatitaaneq arsaarinnissutaassasoq politiiniq aalajangerneqarpat, imaluunniit apeqqutaatitaqanngitsumik biilersinnaatitaaneq arsaarinnissutaappat, biilersinnaanermut allagartaq politiinut imaluunniit kommuneqarfi-imut tunniunneqassaaq. Taamatuttaaq, § 29, imm. 3 malillugu biilersinnaatitaanermi killiliussaqqarpat, biilersinnaanermut allagartaq politiinut imaluunniit kommuneqarfi-imut tunniunneqassaaq.

## Kapitali 8

### *Biilersinnaatitaanermik pigisaqaqqilerneq*

**§ 31.** Biilersinnaatitaanerup politiiniq arsaarinnissutigineqareernerani imaluunniit apeqqutaatitaqanngitsumik arsaarinnissutaareernerani, biilersinnaanermut allagartamik pisaaqqinnissaaq pillugu qinnuteqaat, politiinut imaluunniit kommuneqarfi-imut tunniunneqassaaq. Qinnuteqaammut, § 1, nr. 1 aamma 2 naapertorlugit asseq kiisalu pisortanit atuutilersinneqartoq kinaassutsimut uppersaaniq ilanngunneqassapput. Nakorsaqaarnikkut pissutaasut imaluunniit ikiaroornartunik sianissutsimilluunniit aanngajaarniutiniq allanik pinngitsuuisinnaajunnaarneq imaluunniit imerajunneq pissutigalugu

biilersinnaatitaaneq politiinit arsaarinnissutigineqarsimappat, aammattaaq § 1, nr. 3 naapertorlugu nakorsamit allagarsiussaq tunniunneqassaaq. Aammattaaq biilersinnaanermut allagartamik atuutilersitsinnermut imaluunniit nutarterinnermut allanulluunniit pissutsinut atatillugu tunniunneqartoq, siusinnerusukkut nakorsamit allagarsiussaq, tamatumunnga pissutissaqalersitsippat, taamaallaat nakorsamit allagarsiussaq piumasaqaataavoq.

**§ 32.** Apeqqutaatitaqanngitsumik biilersinnaatitaaneq arsaarinnissutaasimappat, kapitali 10 naapertorlugu qinnuteqartoq nakkutigisamik misilitsinnermik angusisariaqarpoq. Piffissap arsaarteqqaffiusimasup naanissaa siusinnerpaamik qaammammik ataatsimik sioqqullugu, biilerluni misilitsinneq ingerlanneqassaaq.

*Imm. 2.* Nakkutigisamik misilitsinnermik ingerlatsisoqarsimannginnera imaluunniit angusisoqarsimannginnera pissutaalluni biilersinnaatitaaneq politiinit arsaarinnissutigineqarsimappat, allagartartaaqqinneq aatsaat nutaamik nakkutigisamik biilersinnaanermut misilitsinneq angusiffigisimagaanni, pisinnaavoq.

*Imm. 3.* Ikiaroornartunik imaluunniit aanngajaarniutinik allanik pinngitsuuisinnaannginnermik, imerajunnermik peqquteqartumik, imaluunniit peqqissutsimut paasissutissanik peqquteqartumik, ukiut pingasut sinnerlugit biilersinnaatitaaneq politiinit arsaarinnissutaasimappat, nakkutigisamik biilersinnaanermut misilitsinneq angusiffigineqassasoq, nalinginnaasumik allagartartaaqqinnissamut piumasaqaataavoq.

**§ 33.** Biilersinnaanermut allagartamik pisaaqqinnissamut qinnuteqartup piumasaqaatit naammassippagit, § 18-imi maleruagassat naapertorlugit biilersinnaanermut allagartaq suliarineqassaaq.

**§ 34.** Biilersinnaatitaanermik pigisaqaleqqinniarneq pillugu qinnuteqarnermi, qinnuteqartoq biilersinnaatitaanermik arsaarinniffiusumi imaluunniit akuerisaajunnaarfiusumi piffissami tamatumani, inuussutissarsiutigalugu inunnik angallassisinnaanermut atuuttumik allagartaqarsimappat aammalu arsaarinninnissamik imaluunniit akuerisaajunnaarsitsinissamik aalajangiinnermi aammalu eqqartuussivimmit inuussutissarsiutigalugu inunnik angallassisinnaanermut immikkut ittumik akuerisaajunnaarsitsineq pillugu aalajangiisoqarsimanngippat, immikkut ittumik tamatumunnga misilitsinngikkaluarluni, biilersinnaanermut allagartaq, inuussutissarsiutigalugu inunnik angallassisinnaanermik ilalerlugu annertusineqarsinnaavoq. § 23 aamma § 25, imm. 2-mi aalajangersakkat taamatuttaaq atuupput.

**§ 35.** Inunnut motorcykelinut allagartaqarsimasunut, aammalu allagartaajagaasimasunut, Kalaallit Nunaata Politiivi nakkutigisamik ingerlatitsisinnaanermut misilitsinnermik ingerlatsisarnissamut piginnaatitaapput.

*Imm. 2.* Misilitsinnermut 450 kr.-inik akiliuteqartitsisoqartassaaq, taamaattoq § 49, imm. 2 takujuk.

## Kapitali 9

### *Biilersinnaanermut allagartamik nutarterineq*

**§ 36.** Piffissap atuuffiup naalernerani biilersinnaanermut allagartamik nutarterineq pillugu qinnuteqaat, politiinut imaluunniit kommune-fogedimut tunniunneqassaaq. Qinnuteqaammut § 1-i naapertorlugu asseq, nakorsamit allagarsiussaq kiisalu pisortanit atuutilersinneqartoq kinaassutsimut uppersarsaat ilanngunneqassapput. Aammattaaq qinnuteqartoq politiini imaluunniit kommune-fogedimi kinaassutsimut uppersarsaammik (stamkortimik) immersuissaaq.

**§ 37.** Biilersinnaanermut allagartap atuuffiata qaangiunnerata, ukiut pingasut amerlanerilluunniit kingorna, biilersinnaanermut allagartamik nutarterinissaq pillugu qinnuteqarnermi, qinnuteqartup nakkutigisamik misilitsinneq angusiffigissavaa.

*Imm. 2.* Taamaattoq nakkutigisamik biilersinnaanermut misilitsittoqassanngitsoq, politiinit aalajangerneqarsinnaavoq.

**§ 38.** Inuussutissarsiutigalugu inunnik angallassinissamut biilersinnaanermut allagartamik nutarterinissaq pillugu qinnuteqarnermi, taamatuttaaq § 23 aamma § 25, imm. 2 atuupput.

**§ 39.** Biilersinnaanermut allagartaqarnissamut piumasaqaatit qinnuteqartup naammassippagit, biilersinnaanermut allagartaq atuutilersinneqassaaq. Qinnuteqartunut 70-ileereersimasunut, tulluuttunik:

- 1) 70-inik ukiulinnut: ukiunut 4-nut,
  - 2) 71-inik ukiulinnut: ukiunut 3-nut,
  - 3) 72-79-inik ukiulinnut: ukiunut 2-nut,
  - 4) 80-inik ukiulinnut: ukiumut 1-mut,
- atuuffiusussanik aalajangersaasoqassaaq.

*Imm. 2.* Biilersinnaanermut allagartap atuuffia, siusinnerusukkut biilersinnaanermut allagartap atuuffiata ullup naaffia tunngavigalugu imaluunniit taanna kingusinneruppata, nutarteriffiusoq ulloq tunngavigalugu, aalajangersarneqassaaq. § 18, imm. 5-imi aalajangersagaq taamatuttaaq atuuppoq.

*Imm. 3.* Nutarterinissap pisinnaannginnerani, biilersinnaanermut allagartamik nutarterinissaaq pillugu qinnuteqaat tunniunneqarpat, utaqqiisaasumik biilersinnaanermut allagartamik politiit atuutilersitsisinnaapput.

## Kapitali 10

### *Nakkutigisamik biilersinnaanermut misilitsinnernik ingerlatsisarneq*

**§ 40.** §§ 27 og 28 malillugu nakkutigisamik biilersinnaanermut misilitsinnermi, biilersinnaanermut allagartaq misilitsinnermik aqutsisumut takutinneqassaaq. Misilitsinneq angusiffiunngippat, biilersinnaanermut allagartaq politiinut tunniunneqassaaq.

*Imm. 2.* Nakkutigisamik biilersinnaanermut misilitsittussaq, misilitsinnermi atugassamik nammineq biiliniq pissarsissaaq. § 7, imm. 4-mi aalajangersakkat, taamatuttaaq atuupput.

**§ 41.** §§ 27 og 28 naapertorlugu nakkutigisamik biilersinnaanermut misilitsinneq, tamatumunnga inaarutaasumik aalajangiineq, kingusinnerpaamik qaammatit pingasut kingorna, ingerlanneqartassaaq.

**§ 42.** Nakkutigisamik biilersinnaanermut misilitsinneq, § 9, § 10, imm. 1, aamma § 15 naapertorlugit, immikkoortitikkamut (kategori-mut) B-mut (biilinut nalinginnaasunut) maleruagassat malillugit ingerlanneqartassaaq.

*Imm. 2.* Misilitsinneq pineqartup, immikkoortitikkamut (kategori-mut) C-D'mut piumasaqaateqarfiusunut biiliniq, biilernerani tunngavilersorneqarpat, Qinnuteqartoq immikkoortitikkamut (kategoriimut) biilernermut allagartaqarnissaa imaluunniit allagartaqarnikuusimanissaa piumasaqaataalluni, immikkoortitikkamut tamatumunnga biilersinnaanermut misilitsinnermut atuuttut maleruagassat malillugit misilitsinneq ingerlanneqassasoq, politiit aalajangersinnaavaat. Biilernermut misilitsinneq angusiffigineqarpat, immikkoortitikkanut pigineqareersunut biilersinnaanernut allagartaq atuutilersinneqassaaq.

*Imm. 3.* Kingusinnerpaamik misilitsinnerit pingajussaanni, nakkutigisamik biilersinnaanermut misilitsinneq angusiffigineqanngippat, biilersinnaanermut allagartanut tigoqqinnissaannik kissaatigineqartunut immikkoortitikkanut (kategoriinut) biilersinnaanermut allagartaq pillugu maleruagassat malillugit, ilassutitut misilitsinnerusinnaasut ingerlanneqassapput. §§ 27 og 28 naapertorlugu nakkutigisamik biilersinnaanermut misilitsinnermik angusinngitsoorneq pissutigalugu biilersinnaatitaaneq politiinit arsaarinnissutigineqarpat, misilitsinneq angusiffiunngitsoq, misilitsinnertut siullertut isigineqassaaq.

*Imm. 4.* Biilersinnaanermut allagartamik nutarterinerimut atatillugu, ukiuni pingasuni imaluunniit amerlanerusuni biilersinnaatitaaneq arsaarinnissutigineqarsimappat imaluunniit akuerisaajunnaarsimappat, imaluunniit nakkutigisamik biilersinnaanermut misilitsittoqassappat, biilersinnaanermut allagartanut tigoqqinnissaannik imaluunniit nutarternissaannik kissaatigineqartunut immikkoortitikkanut (kategoriinut) biilersinnaanermut allagartat pillugu maleruagassat malillugit misilitsittoqassaaq.

## Kapitali 11

### *Biilersinnaanermut allagartat Kalaallit Nunaanneersuunngitsut*

**§ 43.** Nunani tamalaani isumaqatigiissutit 24. april 1926-imeersoq, 19. september 1949-meersoq imaluunniit 8. november 1968-imeersoq naapertorlugit atuutilersinneqarsimasunik nunani tamalaani biilersinnaanermut allagartaqarunik, imaluunniit Kalaallit Nunaata avataani atuutilersinneqarsimasumik atuuttumik latinerisuunik naqinnilinnik suliarineqarsimasumik imaluunniit qallunaatuumut, tuluttuumut imaluunniit franskisuumut nutsikkamik ilaqartinneqartumik, biilersinnaanermut allagartaqarunik, inuit Kalaallit Nunaanni najugaqanngitsut, Kalaallit Nunaanniikkallarnermi, Kalaallit Nunaannut biilersinnaanermut allagartaqanngikkaluarlutik, biilersinnaatitaapput. Taamaattoq, nutsernertaa pisortanit oqartussaataasumut, imaluunniit nunami atuutilersitsiffiusumi tamatumunnga piginnaatitaasumit kattuffimmit suliarineqarsimanissaa piumasaqaataavoq.

*Imm. 2.* Kalaallit Nunaanneersuunngitsumik biilersinnaanermut allagartamik, inuussutissarsiutigalugu inunnik angallassisoqaqqusaanngilaq.

*Imm. 3.* Kalaallit Nunaata avataani atuutilersinneqarsimasoq biilersinnaanermut allagartaq, nunami atuutilersitsiffiusumi biilini ingellassisinnaatitsinermut, Kalaallit Nunaanni biilini assingusunik biilernissamut piginnittumik pisinnaatitsivoq.

**§ 44.** Inuk Kalaallit Nunaanni najugaqartuunngitsoq, aammalu § 43 naapertorlugu pisariaqartunik biilernermut allagartaqanngitsoq, utaqqiisaasumik Kalaallit Nunaanni biilersinnaanermut akuersissummik (takornariat biilersinnaanermut allagartassaannik) (turistkørekortimik) politiit tunisinnaavaat. Akuersissut ilaatigut, qinnuteqartup nakkutigisamik biilernermut misilitsinnissaanik piumasaqaaserneqarsinnaavoq.

*Imm. 2.* Takornarianut biilersinnaanermut allagartaq (turistkørekorti), Danmarkimi, Finlandimi, Islandimi, Norgemi imaluunniit Sverigemi atuutilersinneqarsimasoq, Kalaallit Nunaanni biilersinnaanermut allagartamut ilaatinneqartunik biilini ingelatsinissamut piginnittumut pisinnaatitsivoq.

**§ 45.** Inuit Kalaallit Nunaanni nunallit imaluunniit nunassittut, Kalaallit Nunaanni biilersinnaajumallutik, Kalaallit Nunaanni biilersinnaanermut allagartamik peqassapput. Tamatuminnga qinnuteqaat, ullut 60-inngortinnagit, politiit imaluunniit kommune-fogedimut tunniunneqassaaq. Taamaattoq, oqaaseqatigiinni siullerni aalajangersagaq, inunnut, Danmarkimi atuutilersinneqartumut biilersinnaanermut allagartamik pilinnut atuutinngilaq.

*Imm. 2.* Inuit Danmarkimi, Finlandimi, Savalimmiuni, Islandimi, Norgemi, Sverigemi atuutilersinneqartumik imaluunniit EU-mi- imaluunniit EØS-mi nunami allami atuutilersinneqartumik atuuttumik biilersinnaanermut allagartallit, biilersinnaanermut misilitseqqaaratik Kalaallit Nunaanneersuunngitsumut allagartaminnut assingusumik kalaallisuumik biilersinnaanermut allagartartaarsinnaapput.

*Imm. 3.* Biilersinnaanermut allagartaq, imm. 2-mi eqqaaneqartuniit nunaniit allaanerusunit atuutilersinneqarsimappat, imaluunniit biilersinnaanermut allagartaq sulit 18-iliinani pineqarsimappat. Kalaallit Nunaannut biilersinnaanermut allagartap atuutilersinneqarnissaa sioqqullugu, pineqartup nakkutigisamik biilersinnaanermut misilitsinneq angusiffigissagaa, politiit piumasaqaatigisinnaavaat. Taamatuttaaq biilersinnaatitaaneq siusinnerusukkut politiit arsaarinnissutigineqarsimappat imaluunniit Kalaallit Nunaanni piumasaqaatitalimmik imaluunniit piumasaqaatitaqanngitsumik akuerisaajunnaarsinneqarsimappat, nakkutigisamik biilersinnaanermut misilitsinnermik angusisimanissaq politiit piumasaqaatigineqarsinnaavoq.

*Imm. 4.* Kalaallisuumik biilersinnaanermut allagartamik atuutilersitsinissaq pillugu qinnuteqaat, politiit imaluunniit kommune-fogedimut tunniunneqassaaq. Qinnuteqartup, kalaallisuu-junngitsumut biilersinnaanermut allagartamut § 1, imm. 1, nr. 1 aamma 2 naapertorlugit asseq kiisalu pisortanit atuutilersinneqartoq kinaassutsimut uppersaarsaat ilanngutissavai. Politiit imaluunniit kommune-fogedimi kinaassutsimut uppersaarsaammik (stamkortimik) immersuisoqassaaq. Aammattaaq pineqartoq qallunaatut innuttaassuseqanngippat, pineqartoq inatsisitigut akuerisaasumik, akuersissuteqaqqaarani Danmarkimiissinnaanngippat aamma Kalaallit Nunaanniissinnaanngippat, pineqartoq nunami najugaqarallarsinnaanermut akuersissummik peqassasoq, piumasaqaatigineqarpoq. Biilersinnaanermut allagartaq kalaallisuu-junngitsoq tunniunneqassanngilaq.

*Imm. 5.* Inuussutissarsiutigalugu inunnik angallassinissamut biilersinnaanermut allagartaq, aalajangersagaq manna malillugu atuutilersinneqarsinnaanngilaq.

## Kapitali 12

### *Oqartussaasut*

**§ 46.** Biilersinnaanermut allagartaq Kalaallit Nunaata Politiivinit atuutilersinneqartarpoq. Biilersinnaanermut misilitsinnissamut innersuunneqarnissaq pillugu qinnuteqarneq, politiinut imaluunniit kommuneqarnermut saaffiginninnikkut pisassaaq.

**§ 47.** Tamatumunnga toqqagaasumit (misilitsitsinermik ingerlatsisuusartumit) politiimit ingerlanneqartumik Biilersinnaanermut misilitsittoqartassaaq.

**§ 48.** Biilersinnaanermut misilitsinnerit pillugit naammagittaalliuutit, Kalaallit Nunaata Politiivinit aalajangiivigineqartassapput. Kalaallit Nunaata Politiivinit aalajangiineq, Færdselsstyrelsenimut naammagittaalliuutigineqarsinnaapput.

*Imm. 2.* Biilersinnaanermut allagartaq pillugu aalajangiinnerit allat, ilaatillugit biilersinnaatitaanermik arsaagaaneq pillugu aalajangiineq aamma nakkutigisamik biilersinnaanermut misilitsinnerit, taamatuttaaq politiinit aalajangiivigineqartassapput. Aalajangiinnerit Færdselsstyrelsenimut naammagittaalliuutigineqarsinnaapput.

*Imm. 3.* Færdselsstyrelsenimut naammagittaalliuutit, Kalaallit Nunaata Politiivinit, suliaq oqaaseqatitalerlugu nassiussisussanut, tunniunneqarsinnaapput.

## Kapitali 13

### *Akitsuit (Gebyr)*

**§ 49.** Immikkoortitikkanut (kategori-nut) B-mut aamma C-D'-mut biilersinnaanermut allagartartaarniarnermut misilitsinnermut, kiisalu inuussutissarsiutigalugu inunnik angallassinissamut biilersinnaanermut allagartartaarniarnermut misilitsinnermut, 450 kr.-inik akiliisoqassaaq.

*Imm. 2.* Nakkutigisamik biilersinnaanermut misilitsinnermut 450 kr.-inik akiliisoqassaaq. Taamaattoq nakkutigisamik biilersinnaanermut misilitsinnermut siullermut, § 28, imm. 1, imaluunniit § 32, imm. 1-i malillugu misilitsinnerunngippat, akiliisoqassanngilaq.

*Imm. 3.* Biilersinnaanermut misilitsittoqarneranut, aammalu motorcykelinut ingerlatsisinnaanermut allagartamik atuutilersitsinermut akitsuutit (gebyrer) pillugit, Kalaallit Nunaata Politiivi aalajangersakkanik aalajangersaanissamut piginnaatinneqarput.

**§ 50.** Atuagarsornermik imaluunniit biilersinnaanermut misilitsinnissamut aalajangeriikkamut qinnuteqartoq, ulloq misilitsiffik sioqqullugu kingusinnerpaamik nal. 12:00 takkussinnaannginnermik nalunaarani takkutinnngitsoorpat imaluunniit misilitsinnerup ilamernganut angusinngippat, misilitsinnermik nutaamik aalajangiisoqannginnerani, takkutinnngitsoorneq, qinnuteqartup, ilinniartitsisup imaluunniit

taassumunnga paarlattaasup allakkiamik uppersaasikkamik napparsimalersimaneranik peqquteqanngippat, nutaamik akiliisoqqaassaaq.

#### **§ 51.** Pisunni tulliuttuni

- 1) § 45 naapertorlugu kalaallisujunngitsoq biilersinnaanermut allagartaq tunngavigalugu kalaallisuumik biilersinnaanermut allagartamik atuutilersitsinermut,
- 2) § 49 naapertorlugu pigisimasaraluup biilersinnaanermut allagartap tammaanera imaluunniit ajoquteqalernera pissutigalugu biilersinnaanermut allagartap assilineranik atuutilersitsinermut,
- 3) biilersinnaanermut allagartallup biilersinnaanermut allagartamut allannguutinik allattoqarnissaanik kissaateqarnera pissutigalugu biilersinnaanermut allagartap assilineranik atuutilersitsinermut,
- 4) § 8 naapertorlugu ilinniartitsisutut akuersissutitalimmik biilersinnaanermut allagartamik nutarterinissamut, aamma
- 5) Inuussutissarsiutigalugu inunnik angallassisinnaanermut, biilersinnaanermut allagartamik nutarterinissamut, taamaattoq imm. 4 takujuk,

200 kr.-inik akiliisoqassaaq.

*Imm. 2.* Qinnuteqartunut, 70-ileereersunut, biilersinnaanermut allagartamik nutarterinissamut, 30 kr.-inik akiliisoqartassaaq.

*Imm. 3.* § 18, imm. 5 malillugu killilimmik piffissaligaasumik biilersinnaanermut allagartamik nutarterineq, akiliinertaqanngitsumik pisassaaq.

*Imm. 4.* § 25, imm. 2 malillugu peqqissutsimut tunngassutillit pissutsit peqqutigalugit killiligaasumik inuussutissarsiutigalugu inunnik angallassinissamut biilersinnaanermut allagartamik nutarterinermut, 100 kr.-inik akiliisoqassaaq.

*Imm. 5.* Politiinut aningaasanik akiliisoqassaaq.

### Kapitali 14

#### *Unioqqutitsinerit, atuutilersiffik aamma ikaarsaarnermut aalajangersakkat*

**§ 52.** § 2, imm. 1, §§ 7 aamma 11, § 19, imm. 1 aamma 3, §§ 30, 40, 43 aamma 45-mik unioqqutitsineq, Kalaallit Nunaannut pinerluttulerinermik inatsit malillugu pineqaatissiissutinik kinguneqarsinnaavoq.

*Imm. 2.* Nalunaarut naapertorlugu akuersissummut piumasaqaatinik sumiginnaaneq imaluunniit nalunaarut naapertorlugu nalunaarutigineqartunik inerteqqutinik imaluunniit peqqusissutinik naammassinninnginneq taamatuttaaq Kalaallit Nunaannut pinerluttulerinermik inatsit malillugu pineqaatissiissutinik kinguneqarsinnaavoq.

**§ 53.** Nalunaarut **ulloq 1. april 2026** atuutilersinneqassaaq.

*Imm. 2.* Kalaallit Nunaannut biilersinnaanermut allagartaq pillugu nalunaarut nr. 952, 23. november 1994-imeersoq, atorunnaarsinneqarpoq.

*Imm. 3.* Kalaallisuujuunngitsumik biilersinnaanermut allagartaqartut inuit Kalaallit Nunaanni najugaqartut, § 45 naapertorlugu, biilersinnaanermut allagartamik kalaallisuumik pissarsinissamik tungaanut, biilersinnaanermut allagartaq taanna tunngavigalugu, unioqqutitsinngitsumik biilersinnaasut, Kalaallit Nunaata Politiivisa aalajangersinnaavaat.

*Imm. 4.* Kalaallit Nunaannik illersuinissaq pillugu kunngeqarfiup Danmarkip aammalu Amerikami Naalagaaffiit Peqatigiit naalakkersuisuisa akornanni Atlantikup Avannaani Isumaqatigiissut naapertorlugu Københavnimi ulloq 27. april 1951-imi pineqartoq isumaqatigiissutaasoq pillugu nalunaarummi nr. 23, 20. juni 1951-imeersumi ilanngutassiaq 2, nr. 3-mut ilaatinneqartunut nalunaarut manna illersornissamut suliaasaqarfinnut atuutinngilaq. Aaqqissuussamik nalunaarummi aalajangersagaasumik ingerlatsinissamut, politiiik pisariaqartunik tamakkununga aallartitaqarfiunngitsunik, sumiiffinnik taamaattunik immikkut ittunik aalajangersimasunik nalunaarut ilaqassanngitsaq, Kalaallit Nunaata Politiivisa aalajangersinnaavaat. Oqaaseqatigiit aappaanni eqqaaneqartunut sumiiffinnut, Kalaallit Nunaata Politiivi maleruagassanik immikkut ittunik aalajangersaasinnaasut.

## **Ilanngusaaq 1**

### **1. Biilersinnaanermut misilitsinnermut siunertaasoq**

Biilersinnaanermut ilinniarnep siunertarisaatut aammalu biilersinnaanermut allagartartaarnissamut piumasaqaataasut ilisimasassat aamma pinnaasassat ilinniartup pissarsiarisimanerai, misilitsinnermik nakkutilliisup nalilissagai, biilersinnaanermut misilitsinnerup siunertarivaa.

#### **1.1 Misilitsinnissamut piumasaqaatit aamma ilinniarnermi angusassat**

Biilersinnaanermut ilinniarnep aamma biilersinnaanermut misilitsinneq pillugit aalajangersakkat, Kalaallit Nunaannut biilersinnaanermut allagartaq pillugu aalajangersakkami matumani kiisalu Kalaallit Nunaanni biilersinnaanermut ilinniarnermut atuagarsuummi (teoribogimi) imaritinneqarput.

### **2. Atuagarsornermut misilitsinneq**

Biilnut nalinginnaasunut misilitsinneq, nalinginnaasumik nalunaaquttap akunnerata affaanik sivilissuseqartarpoq. Misilitsinneq allattariarsorneruvoq, politiiinilu akuerisaasunik atuagarsornermut misilitsinnermut atortunik atuilluni ingerlanneqartassalluni. Qinnuteqartut, pissutsit, allakkiatut uppersaasigassaasut, immikkut ittut pissutaallutik, atuagarsornermik nalinginnaasumik misilitsinnannngitsut, misilitsinnermut immikkut ittumut, tamatumani biilersinnaanermik misilitsinnermut akisussaasuusoq apeqqutini atuffassisuussalluni imaluunniit qinnuteqartup ilisimatitsinera malillugu, immersugassamik kryds-ilersuisuuffigisaanut, innersuunneqarsinnaapput.

- A. Qinnuteqartup, atuagarsornermut misilitsinnermi, angallannermut maleruagassanik tulluuttunik ilisimasaqarnini uppersassavaa:



1. Misilitsinnermut atorineqartunik biilerisanik aqutsinnermut pingaarutillit angallannermut maleruagassat.
2. Qinnuteqartup misilitsinnermi, pingaartumik maleruagassat tulluuttut ilisimasaqarfigilluarlugillu paasilluarsimassavai:
  - 1) Soqutigittartumik pissusilersornissaq aammalu angallannermi misissorneq pillugit maleruagassaq nalinginnaasoq.
  - 2) Angallannermi ajutoornermi pisussaaffiit pillugit.
  - 3) Biilit aqquataanni inissisimaneq, ilaatillugit sanguneq aamma utimut saanneq pillugit.
  - 4) Naapikkiartorneq, qaangiineq, biilit aqquataannik nikinneq pillugit.
  - 5) Tunuarsimasusaaatitaanermut aalajangersakkat.
  - 6) Pisuinnarnut, angallattut immikkut ittut aamma qimussit uumasuutillu angallanneqartut pillugit pisussaaffiit.
  - 7) Uninneq aamma inissinneq pillugit aalajangersakkat.
  - 8) Sukkassutsit pillugit aalajangersakkat.
  - 9) Aquttuusup aamma piginnittuusup akisussaaffii aamma pisussaaffii.
  - 10) Atuarnikkut ilikkagaqarsimaneq pillugu aalajangersakkat.
  - 11) Poliitiit angallannermut aalajangersaanerit, qaammartitsilluni kalerrisaarutit, aqqusinnermik nalunaaqutsersuinerit – ilaatillugit Kalaallit Nunaanni atorineqartut angallattunut sianigisassatut takussutissiat, tamakkualu isumaat.
  - 12) Angallannermut inatsimmik ilisimasaqarneq, napparsimaneq aamma aalakoornartoq tamakkualu aquttup qisuariarsinnaassusianut sunniutaat pillugit maleruagassat.
  - 13) Qaammaqqusersorneq pillugu angallannermut inatsimmi maleruagassanik ilisimasaqarneq.
  - 14) Kalerrisaarutit aamma assilissat pillugit angallannermut inatsimmi maleruagassanik ilisimasaqarneq.
  - 15) Orsussap ikumanikuinik ipinartunik najuussuinerup ulorianaataanik ilisimasaqarneq.

### 3. Biilernermik misilitsinneq

Misilitsinnermut, nalinginnaasumik minutsit 30-niit minutsit 45-t tungaannut, immikkoortinneqartarput.

A. Biilit pequtsersugaanerit aamma atortui pillugit qinnuteqartup tulluuttut allakkiatut uppersarsinnaassavai:

- 1) Aquutaa piuminartumik, qularnaatsumik sukkasuumillu atorineqarsinnaassaaq. nungullaannerit imaluunniit assigisaat pissutigalugit, aquutaa ataatsimut isigalugu imaluunniit pisataani ataasiakkaani, malunnaatilimmik qasukkaanneqaleqqusaanngilaq.
- 2) Aquutaani qasukkaannermik uuttuineq aamma aquutaani qasukkaanneq akuerineqarsinnaanersoq pillugu paasinninneq.
- 3) Bremsit (unissaatit) pissusissamissoornerit qanoq paasineqartarnerannut ilisimasaqarneq.
- 4) Silaannaqanngissutsimut sakkortusaataata (Vakuumforstærkerens) naqitsinera, motor-i uninngatillugu, bremsepedal-imik (unissarnermut tukertakkamik) arlaleriarluni tutisinikkut assigiissarneqartarpoq.
- 5) Bremsepedali (unissarnermi tukertagaq) naleqquttumik malunniunnani nikissinnaaffeqassaaq.

- 6) Ataasiaannarluni tukersinermi, qaffasinnerpaaffiata aamma appasinnerpaaffiata akornanni nikissinnaaffiata affaa missiliorlugu annertussusilimmut killiffimmut annerpaamik bremsepedali naqinneqarsinnaassaaq.
- 7) Bremsepedali (unissarnermi tukertagaq) tuteqqaatigalugu, motoori aallartillugu, Bremsepedalilu (unissarnermi tukertagaq) appariaallannersoq maluginiarnertigut, silaannaqanngissutsimut sakkortusaataa (Vakuumforstærkeren) atuunnersoq misilinneqassaaq.
- 8) Biilnik inissiinermi assammik nusuttagaq bremsi, naleqquttumik malunnaateqanngitsumik nusulaarsinnaassaaq, aammalu tamakkiisumik nusunnerani, sukaqqalluni uninngasinnaassalluni.
- 9) Qinnuteqartup, oqariartaatsit qisuariarnissamut takissuseq, bremserluni unissarnermut takissuseq aamma uninnissamut takissuseq ilisimasaqarfigissavai. Pineqartup, bremserluni unissarnerup takissusaata aamma sukkassutsip akornanni pissutsit (kisianni atuagarsornermut atuakkami allassimasut, bremserluni unissarnermut takissusermut il.il. sukkassutsinut ataasiakkaanut – tamatumani assersuutigalugu sukkassuseq marloriaatinngoraangat, bremserluni unissarnermut takissutsip sisamariaatinngortarnera, akerlianik qisuariarnissamut takissutsip taamaallaat marloriaatinngortarneranik, annertussutsit pinnagit), ilisimasaqarfigissavai. Aquttuusup qisuariarsinnaassusaa, bremsit qanoq issusaat, biilip sukkassusaa, aqquserngup pitsaassusaa, aqquserngup qalligaanera aammalu aqquserngup uinganera, unissarnerup takissusaanut sunnuteqarnerat qinnuteqartup ilisimasaqarfigissavai. Aammattaaq piffissamut qisuariarfissamut aammalu assakaasut parnaarlugit bremsernerup siunertamut akerliuneranut, sillimaniarnermik inisseqqanerup isumaa qinnuteqartup ilisimassavaa.
- 10) Biilit aqunniarnerinut- aamma unissarluni bremserinnaassusaannut, assakaasut torlunnermut sakkukillisaataasa sunniutaat.
- 11) Biilit aqunniarnerinut- aamma unissarluni bremsernissamut isumannaassusermut assakaasut qanoq issusaasa sunniutaannik ilisimasaqarneq.
- 12) Biilnik eqqortumik passussinermi aamma aserfallatsaaliuineri, pisariaqanngitsunik nipiliornernik il.il., pinaveersaarinnissamik ilisimasaqarneq.

Angallannerup isumannaatsuunissaanut sunniutilinnik amigaatinik pisoqalersinnaanerani paasisaqarsinnaanngorneq, biilnut taakkualu passunnissaannut qinnuteqartoq ilisimasaqarnersoq aalajangiiffigissallugu, immikkoortuni 1-imiit 12-imut allassimasumi misilitsinnermut piumasaqaatini, siunertaavoq. Tamatuma akerlianik, sannaasa ilusaannik, atortorissarutitigut immikkuualuttunik aammalu atortorissarutit taaguutaannik, soraarummeersitsissutigineqaqqusaanngillat.

## B. Misilitsinnermut ingerlatsisumut

Misilitsinnermik ingerlatsisuusoq, nalinginnaasumik isumannaassusermut eqqarsaatiginninneq imaluunniit angallannerup ingerlatinneqarnissaa tamatuminnaga pisariaqalersitsippat kisianni allatigut akuleruttariaqarani, misilitsinnerup ingerlanerani, aqunnermut atortutigut akulerutissaaq. Misilitsinnermik ingerlatsisuusoq, ajornanngippat siunnersuinaveersaassaaq, kisianni qinnuteqartup pissusilersornera qimerluussallugu. Angallattunut allanut aamma aqqusernermut-, silamut-, aamma

qaamanermut pissutsinut naleqqiullugu qinnuteqartup angallannermi maleruagassat eqqortinnerai, pineqartup angallannermut tulluarsarnersani paasisimaneraa, ingerlaninilu (ilaatillugit sukkassutsini aamma biilerisat biilit aqqutaanni eqqortumik ingerlannerlugit) tulluarsaneraa, qinnuteqartoq, angallannermi pissutsinik navianarsinnaasunik (aqquuserngit paarlannerannik, meeqqanik pinnguartaunik il.il.), ilaqaleraangata sillimaniarnermik inissittarnersoq, angallattunut allanut pisariaqartumik eqqarsaatiginnittarnersoq allatullu angallanneq pisariaqangitsumik akorngusinnginneraa, pisariaqartumik eqqissisimanermik aamma qisuariarsinnaanermik ersersitsisoqarnersoq, biilini atortut eqqortumik aammalu pisariaqartumik sungiussisimassuseqarluni passunnerai kiisalu biilernerq eqqissisimassuseqarluni, ilaatillugu angallannerup pisoqarfiuneranik siumut naatsorsuisinnaassuseqartumik ingerlanneraa, pingaartumik qimerloorneqassaaq. Qinnuteqartoq eqqarsartaatsikkut timikkullu pisariaqartumik periallaqqissuunersoq aamma isumannaassusermut pingaaruteqartutut nalilerneqarpat, qinnuteqaammi pisariaqassappat tamatuminnga oqaaseqaateqarnissamik, misilitsinnermik ingerlatsisuuusoq eqqumaffiginnittariaqarpoq.

Misilitsinnermut pisariaqartut innersuussutit, misilitsinnermut ingerlatsisumit ima erseqqitsigisumik aammalu ima piffissaqartitsilluartigisumik tunniunneqassapput qinnuteqartoq innersuussummik paasinninnissamut iliuuseqarnissamullu naleqquttumik piffissaqartilluarlugu. Angallannermut maleruagassanut akerliusumik qinnuteqartup iliuuseqarnissaanut pissutissaqalersitsisumik, innersuussutinik tunniussisoqaqqusaanngilaq. Misilitsinneq ima siulersussallugu, angallattunut allanut sapinngisamik annikinnerpaamik ajoqutaasumik pisoqarnissaa, misilitsinnermut ingerlatsisuuusup pisussaaffigaa.

#### C. Biilernerq sioqqullugu isumannaallisaanermut sillimmartaarutit

Misilitsinnerup aallartinnerani, misilitsittussap sanianut ilaasup inaanut misilitsinnermut ingerlatsisuuusoq ingissaaq. Qinnuteqartoq biilernissamut inissisimanermik siunertamat naleqquttumik inissinnersoq (aquttup issiavianik inissiilluarluni) aamma pineqartoq isumannaallisaanermut sillimmartaarutitik pisariaqartunik assersuutigalugit aquttumut tarrarsuutitik inissitsiterineratigut, qimerluuinersoq, igalaat tamarmik pisariaqartumik isikkiveqarnerannik qulakkeerinersoq aammalu kalerrisaarutitut atortunik, bremsinik aquummillu misiligaaneratigut nakkutigineqassaaq.

#### D. Aquttaatsit immikkut ittut

Misilitsinnermik ingerlatsisuuusoq qinnuteqartup biilit aallartitsinnagit biilit frigearimiinnerannik assammillu bremsip nusulluaqqaneranik qulakkeerisisimanissaanik eqqumaffiginnissaaq. Aqqusinerni angallaffiuallaanngitsuni aqunermut misiligaatinik, soorlu illuanut saannernik, aallariarnernik, uteriarsornertalimmik pisuinnaat aqqutaasa sinaannut inissinnermik, ingerlataqartoqassaaq. Qinnuteqartup misilitsinnerit tamakkua nalaanni angallattunut allanut, pisuinnaat aqqutaasa killinginut il.il. naleqqiullugit biilit killigisaannik ilisimanneqqissaarnermik takutitsissaaq. Qinnuteqartup, ungasissutsit aamma sukkassutit eqqortumik nalilersinnaassavai, aqqusinikkut sivingasukkut bremsit atorinissaat, aammalu illuatungaanut saanniarnermi siumorsornermiit uteriarsornermut nikittarneq paasisimassallugu, assammillu bremserutit atorneratigut

sunniuteqarluartumik bremserneq paasisimalluassallugu. Sangusaqattaarnerit iluanni qinnuteqartup angallattut allat eqqarsaatigiuassavai.

Illoqarfinni, angallannermut pissutsit ajornartorsiornartigalutik, biilerluni misilitsinneq kissaatigisatut ingerlanneqarsinnaanerata pisinnaanngiffianni, aqunnermut misilitsinnerit naleqquttumik annertusaaserneqartariaqarput.

#### E. Illoqarfimmi biilernerumut misilitsinneq

Ilaatigut sumiiffinni angallaffiuallaanngitsuni ilaatigullu nalinginnaasumik angallaffiusuni, sukkassutsimi nalinginnaasumi biilerneq ingerlanneqassaaq.

Illoqarfimmi pingaarnertut angallaffiusumi, sapinngisamik illugiisillugit attuumassutilinnik aqqusinilimmi ilaatigut amitsunik aqqusinilimmi, sumiiffinni biilertoqassaaq. Ingerlavik ima, aqqusinerniit angallaffiorpiannngitsuniit aqqusinernut annerusunut killormullu sanguffiusartunik aqqusaartuisumik aqqqissuunneqartariaqarpoq.

Biilernerup nalaani, igalaat saligutaat, kiassaat, kanerneriaat, qulliit (ilaatillugit qaammaqqutininik sakkukilliliineq) aamma igalaavinik ammaatiterineq aammalu matooraaneq, qinnuteqartup atorsinnaasariaqarpai.

Sumiiffimmi pissutsit periarfissaqartitsippata, misilitsinnerup nalaani biilininik allanik qaangiinnermik misiliisoqartariaqarpoq.

### **4. Ulikkaarlutik usillutik 3500 kg.-ut sinnerlugit oqimaassusilinnik biilininik biilersinnaanermut allagartamut misilitsinneq**

Immikkoortuni 1-imiit 3-mut eqqaaneqartut saniasigut, aammattaaq biilit tamakkua pillugit (bremsiisaa atortoqarfiinut, usilersornermut maleruagassanik immikkut ittunut) aalajangersakkanut immikkut ittunut ilisimasaqarnermik, misilitsinneq ilaqarpoq.

### **5. Misilitsinnermik naliliineq**

Politiit malittarisassiaat malillugit atuagarsornertaanut misilitsinneq nalilerneqassaaq.

Biilernerumik misilitsinnermi sungiussisimarpaluttumik imaluunniit kukkuneqanngitsumik biilersinnaaneq piumasaaqatigineqaaqusaanngilaq, kisianni, ilungersunartut aamma annikinnerusumik ilungersunaatillit kukkunerit akornanni immikkoortitsisoqassalluni. Qinnuteqartup biilernerata ataatsimut isigalugu nalilerneqartussaammat, kukkunerit annikinnerusut ataasiakkaat, misilitsinnermut angusinnngitsoornermik nassataqartariaqanngillat. Qinnuteqartup naammassisai, annikinnerusumik ilungersunaatilinnik arlalinnik aammalu pingaartumik uteqqiattunik kukkunernik ilaqarpata, misilitsinnermik ingerlatsisuusup naliliinera malillugu misilitsinneq angusiffiunngitsutut isigineqartariaqarpoq. Qinnuteqartup, pissusissamisoortumik annilaanganerminik ajugaaffiginninnissaminut piffissalernerneqartariaqarnera eqqarsaatigalugu, misilitsinnerup aallaqqaaterpiaani, nalinginnaasumik aalajangiisuusumik naliliisoqaaqusaanngilaq.

Taamaattoq, angallattunik allanik apuisinnaaneq pinngitsoortinniarlugu, misilitsinnermik ingerlatsisuusq akuleruttariaqarpat, tamanna atuutinngilaq.

Kukkunerup ilungersunartutut imaluunniit annikinnerusumik ilungersunartutut isigineqarnissaa pillugu aalajangiinnermut tunngaviusussat, tassaapput pingaarnertut angallannermi isumannaallisaanermut kingunerisassai, tamatumunngalu tulliullugu angallannerup akornguteqanngitsumik ingerlanneqarnissaa. Sumiissusersiornerit imaluunniit aqutsinerit pillugit kukkunerit, apuisinnaanermik, imaluunniit ajunaarnermik allamik, pisoqarsinnaaneranik nassataqartut, ilungersunartutut isigineqarput. Taamaattumik kukkunerit taamaattut imminni, misilitsinnermik angusinngitsoornertut isigineqarsinnaapput, pissutsillu malillugit misilitsinneq unitsinneqarsinnaalluni.

Aqqusinnermi taamatut inissisimaffeqarluni siumut ingerlalluni imaluunniit taamatut sukkatigaluni, qinnuteqartup eqqarsaatiginnilluarnermik aamma naatsorsuisinnaassusermik amigaateqarnermik erseqqissumik takutitsineranik ilimanaatilimmik nueriataarsinnaasunut, akorngutitut ersinngitsunut sumiissusersinissaminut aamma uninnissaminut qinnuteqartup angumerisinnaanngisaanik apuisinnaanermik imaluunniit ajunaarnermik allamik imaaliallaannaq pisoqarsinnaaneranik pisunik taamaallaat ilaqanngilaq. Tamanna assersuutigalugu sangusarissani isikkiviluttuni imaluunniit qattunerni aammalu isikkiviluttuni aqquserngit paarlaffiini iluiniluunniit siumut ingerlanermi atuuppoq.

Biilnik ingerlatsinnermi uteqqiattumik kukkunerit, pisariaqartumik isumannaassusilimmik qinnuteqartup biilnik aqutsisinnaannginnera, erseqqissumik qulaajartarmassuk, ilungersunartutut isigineqartariaqarput.